

**S1 3 IŽ 026006 17 IŽ**  
**Sarajevo, 08.08.2017.godine**

Sud Bosne i Hercegovine u Sarajevu, u apelacionom upravnom vijeću, sastavljenom od sudija Zvezdane Antonović kao predsjednika vijeća, dr Branka Moraita i Mirsade Džindo, kao članova vijeća, u pravnoj stvari izricanja novčane kazne i mjere zabrane angažovanja za rad na biračkom mjestu, odnosno u organima nadležnim za provedbu izbora, žalioca Mahić Aldina, Mahmić selo bb, Bosanska Krupa, protiv odluke Centralne izborne komisije Bosne i Hercegovine, broj: 05-1-07-5-146/17 od 27.07.2017. godine, na nejavnoj sjednici održanoj dana 08.08.2017.godine donio je ovo:

## **R J E Š E N J E**

### **Žalba se odbija**

### **O b r a z l o ž e n j e**

Odlukom Centralne izborne komisije Bosne i Hercegovine, broj i datum navedeni u uvodu, žalioцу Mahmić Aldinu je izrečena novčana kazna u iznosu od 300,00 KM i zabrana angažovanja za rad na biračkom mjestu, odnosno u organima nadležnim za provođenje izbora na period od 4 (četiri) godine, računajući od dana pravosnažnosti osporavane odluke, iz razloga što je Centralna izborna komisija Bosne i Hercegovine utvrdila da je žalilac kao član biračkog odbora na biračkom mjestu broj 004A014A u Osnovnoj izbornoj jedinici Bosanska Krupa, na dan održavanja Lokalnih izbora 2016. godine, odgovoran što je u obrascu za zbirne rezultate( većinski glas) za Općinsko vijeće Bosanska Krupa pogrešno evidentirao glasove po političkim subjektima i kandidate političkog subjekta SDA-Stranka demokratske akcije, suprotno članu 5.25. Izbornog zakona BiH.

Protiv ove odluke žalilac je blagovremeno uložio žalbu u kojoj navodi da nije CIK BiH pravilno utvrdila činjenično stanje u ožalbenoj odluci, jer da je žalilac obavljao poslove izdavanja glasačkih listića i nije vršio prebrojavanja glasova, jer nije čitao oznake na glasačkim listićima niti je iste evidentirao u pomoćne obrasce. Ističe da je predsjednik biračkog odbora odgovoran za rad biračkog odbora jer da on evidentira glasove u propisane obrasce. Predlaže da se žalba uvaži i žalilac oslobodi odgovornosti zbog povrede Izbornog zakona BiH.

Centralna izborna komisija Bosne i Hercegovine dostavila je ovom sudu odgovor na žalbu u kojem je predložila da se izjavljena žalba odbije kao neosnovana.

Ispitujući ožalbenu odluku u okviru žalbenih navoda vijeće je zaključilo da je žalba neosnovana.

Imajući u vidu relevantne propise i to odredbe člana 5.25 Izbornog zakona BiH („Službeni glasnik BiH“ broj 23/01 do 31/16), Sud je utvrdio da je odluka CIK-e BiH pravilna i zakonita.

Odredbom člana 5.25 Izbornog zakona BiH je propisano da nakon zatvaranja biračkog mjesta i završetka postupka brojanja, birački odbor u odgovarajuće obrazce unosi sljedeće podatke: ukupan broj glasova, ukupan broj važećih glasova za svaku političku stranku, koaliciju, listu nezavisnih kandidata i nezavisnog kandidata, ukupan broj glasova za svakog pojedinačnog kandidata na kandidatskoj listi, ukupan broj nevažećih glasačkih listića, posebno navodeći broj glasačkih listića koji su nevažeći jer nisu ispunjeni, a posebno broj glasačkih listića koji su nevažeći jer su pogrešno ispunjeni; ukupan broj upropaštenih glasačkih listića; ukupan broj nepotvrđenih glasačkih listića koji se nalaze u glasačkoj kutiji, ako ih ima i ukupan broj neiskorištenih glasačkih listića. Zapisnik o radu biračkog odbora i odgovarajuće obrasce potpisuju svi članovi biračkog odbora. Ako neki član odbije da se potpiše, predsjednik ili jedan od članova koji se potpisuju to će evidentirati zajedno sa razlozima nepotpisivanja. Opisanim postupanjem žalilac je počinio prekršaj odredbe člana 5.25 stav (1) tačka 2) Izbornog zakona BiH, pa mu je pravilnom primjenom materijalnog prava odredbe člana 6.7 stav (1) tačke 1) i 4) Izbornog zakona BiH i primjenom odredbe člana 19.8 stav (2) navedenog zakona izrečena novčana kazna i mjera zabrane angažovanja iz dispozitiva ožalbene odluke.

Odredbom člana 2.20. stav (1) Izbornog zakona BiH propisano je, između ostalog, da predsjednik upravlja radom biračkog odbora i zajedno sa članovima biračkog odbora, odgovoran je za zakonitost rada na biračkom mjestu, održava integritet procesa glasanja, odnosno brojanja i održava mir i red na biračkom mjestu i njegovoj okolini; popunjava sve potrebne obrasce.

Uvidom u spise predmeta ovo vijeće je zaključilo da je donosilac ožalbene odluke pravilno utvrdio da je žalilac odgovoran za nepravilnosti učinjene prilikom evidentiranja broja osvojenih glasova za pogrešno evidentirao glasove po političkim subjektima i kandidate političkog subjekta SDA-Stranka demokratske akcije za Općinsko vijeće Bosanska Krupa, a što predstavlja povredu gore navedenih zakonskih odredbi.

Odgovornost žalioaca se zasniva na činjenici da je učestvovao u postupku brojanja glasačkih listića i popunjavanja obrazaca, kao i činjenici da je ispravnost navedenih podataka potvrdio svojeručnim potpisom na obrascima.

Mada žalilac ne prigovara na visinu izrečene kazne, ovo vijeće je cijenilo činjenicu da je Mahmić Aldin bio član biračkog odbora, te da je zajedno sa predsjednikom i drugim članovima odbora odgovorna za zakonitost rada na biračkom mjestu, te je utvrđeno je da je izrečena kazna u okvirima zakonskog minimuma srazmjerna učinjenom prekršaju.

Centralna izborna komisija je pravilno postupila određivši žalitelju i mjeru zabrane angažovanja za rad na biračkom mjestu, odnosno u organima nadležnim za provođenje izbora na period od 4 (četiri) godine, računajući od dana pravosnažnosti osporavane odluke, nalazeći kao otežavajuću okolnost činjenicu da je imenovani odslušao cjelokupnu obuku za rad u biračkom odboru prema Planu i programu stalne edukacije članova organa za provođenje izbora, a što prihvata i ovo vijeće.

Iz navedenih razloga Apelaciono upravno vijeće ovog suda nalazi da je pobijana odluka Centralne izborne komisije Bosne i Hercegovine pravilna i zakonita a žalba neosnovana, pa je istu primjenom odredbe člana 81. stav 1. druga rečenica, Zakona o upravnim sporovima Bosne i Hercegovine („Službeni glasnik BiH“ broj 19/02 do 74/10) valjalo odbiti.

Zapisničar

**Predsjednik vijeća**  
**Sudija**  
Zvezdana Antonović